

Bouxvunz Hawj Gou Yaenqsiengq Gig Laeg Ndeu

一个给我印象很深的人

贵港市覃塘区蒙公乡古山小学六年级 邓美芳



Youq ndawsim moix boux vunz, cungj miz boux vunz yaenqsiengq gig laeg ndeu. Gou hix ityiengh, boux vunz hawj gou yaenqsiengq gig laeg haenx couh dwg boux lauxsae daih'it gou.

Mwh gou ngamq hwnj siujyoz it nienzgaep, haihag ngoenz daih'it, daxmeh daiq gou bae bauqmingz. Byaij youq gwnz loh, gou ndawsim gag siengj: "Lauxsae gou dwg bouxvunz

baenzlawz yiengh ne? Dwg mbouj dwg bouxvunz gig yak gig dwglau ndeu ne……" Gou doq naemj doq byaij, mbouj rox seiz lawz daxmeh couh daiq gou daengz dangqnaib boux lauxsae mehmbwk he bae lo. Daxmeh doiq gou naeuz: "Vaiq heuh lauxsae ndei." Gou sing iq naeuz: "Lauxsae ndei." Lauxsae hix riunyumj naeuz: "Siuj baengzyoux ndei." Gij sing de geijlai unqswnh, geijlai ndei dingq ha, de couh dwg lauxsae gou, gou ndawsim gig angq, nyaenx mbouj ndaej lai yawj de geij mbat. De samcib lai bi, maj ndaej mbouj sang hix mbouj daemq,

aenndang reuxred, aennaj saundei youh caenciet, doiq da ronghrikrik, yawj bae gig miz cingsaenz, byoem de raezrangrang, hoeng gaenq miz di byoemhau cab youq ndaw lo. Bauqmingz ndaej le, de youh daengq gou naeuz: "Geiq ndaej ciuqseiz daeuj hagdangz bw." Mwh de doiq gou riu, gou couh rox, de itdingh dwg boux lauxsae ndei ndeu.

Cingq dwg yienghneix, gou gig gyaiez dingq de gangigoq, dinglingz daj it nienzgaep daengz roek nienzgaep, cungj dwg de son dou yijvwnz. De gangigoq seiz sing de gig ndei

dingq. De sonsaw gingniemh gig lai, de bingzseiz hawj dou sij cozyez gig noix. De ciengzseiz doiq dou naeuz: "Gou mbouj iugouz sou sij geijlai cozyez, hoeng mwh sij cozyez sou itdingh nyinhcaen sij, miz seizgan sou couh lai bae yawj di sawgovai, hag lai di cihsiz. Yienghneix dou hagsib couh mbouj gamjdaengz dwgrengz, yienghneix hag hwnjdaej couh gig soengset.

Neix couh dwg boux lauxsae daih'it gou, gij yaenqsiengq de louz hawj gou haenx, gou ciengxlwenx mbouj lumz ndaej.

(指导老师: 韦凤玲)

Aen Habbit Gou

我的文具盒

贵港市覃塘区蒙公乡古山小学五年级 庾鑫

Gou miz aen habbit ndeu, neix dwg mehgx gou ma gvaq cieng seiz soengq hawj gou, gou gig gyaiez aen habbit neix.

Aen habbit neix fahab daih-fueng ndeiawj, raez miz 20 lizmij, gvangq miz 10 lizmij, daenj geu buhrog saeklamz, buhrog baihgwnz miz geij aen cihmeh "disney" caeuj duz Mijlaujsuj he, gou daegbied gyaiez duz Mijlaujsuj neix, de daenj geubuh saeklamz caeuj geuvaq saekndaem, gwnz gyaiej daenj aen mauhau, baij ok gij yienghceij gig dwggayez. Gou lij an aen coh caenciet ndeu heuh "siujmij" hawj duz Mijlaujsuj neix.

Aen habbit gou cij miz caengz ndeu, hoeng de coux ndaej bit gig lai, coux ndaej 5 gonj bitndaem, 2 gonj bithoengz, gonj yienzbit ndeu, 4 fag cik, lijimiz gaucat dem. Gyoengqde youq ndaej gig doxndei, couh lumj bang lwgnyez ndeigyaez caez youq ityiengh.

Moix baez gou sij cozyez, gou cungj daj ndaw habbit dawz ok gonj bitndaem, nyinhcaen sij cozyez. Gou yaek veh veh seiz, gou couh dawz yienzbit daeuj veh veh. Mwh lauxsae bingz hawj gou "youh" seiz, gou hix mbouj lumz bae yawj gyoengqde, aenvih neix hix miz gij goenglauz gyoengqde ya.



Gaej yawj aen habbit gou bingzseiz coenz vah hix mbouj gangj, hoeng baez daengz seiz youqgaenj, de cix bang gou haujlai. Aen habbit neix couh lumj aen ranz ndeu, gonjbit, fagcik, gaucat cungj dwg ranz vunz ndeu, gyoengqde doxhuz guhdoh youq, bang gou sij gak cungj cozyez.

A! Habbit gou, mwngz ngoenzngoenz bang gou guenj ndei gij bit gou, hawj gou ndeindei sij cozyez, docih mwngz, nyienh mwngz buenx gou caez gvaq siujyoz duenh seizgan ceiq ndei neix.

(指导老师: 韦凤玲)

Gou Gyaiez Seizcou

我爱秋天

贵港市覃塘区蒙公乡古山小学三年级 覃冲

Seizcou daeuj lo, seizcou daeuj lo……Mbwn yienghhaenx sang, yienghhaenx lamz. Yawj hwnj gwnz mbwn bae, miz geij duj fwjhau, lumj dujva yienghneix gyaundeidei…….

Laj mbwn dwg nazhaeux muengh mbouj raen henz. Haeux henj lo, henjrwgrwg, lumj gim bu rim doengh, gig ndeiawj.

Henz nazhaeux miz aen daemz ndeu, henz daemz miz go faexgyaeuq ndeu, mbaw henj baenz mbaw baenz mbaw daj gwnz gofaex loenq roengzdaej. Miz mbangj doek roengz ndaw raemx, byalgw youz gvaqbae, ndoj youq baihlaj, dawz mbawfaex dangguh liengj, gig vaiqvued. Miz mbangj doek youq haenzhamq, duzmoed raih hwnjbae, buet bae buet dauq, dawz de dangguh aen cauhcangz yindung.

Baih nazhaeux haenx mbin daeuj song duz roegenq, yawj-raen mbawfaex loenq roengzdaej, doq mbin doq hemq, lumj baenz gangj: "Dienhbauq daeuj lo, coi raeuz bae baihnamz vaiq di lo……"

Seizcou caen gyaundeidei ha, gou gyaiez seizcou!

(指导老师: 韦慧)



Lauxsae, Gou Siengj Doiq Mwngz Gangj

老师,我想对您说

贵港市覃塘区蒙公乡古山小学六年级 韦丹梅



Lauxsae gingqgyaez:

Mwngzndei!

Dou couh yaek bizyez lo, couh yaek biek mwngz bae lo. Ndawsim gou miz haujlai vah singj doiq mwngz gangj.

Lauxsae, mwngz daj it nienzgaep son gou daengz roek nienzgaep, moix ngoenz mwngz youq gwnz hwzbanj sij gij cih cingjaez ndeiawj, gij sing sij cih haenx hix gig ndei dingq, gij singyaem haenx mbouj dwg fwndoek yiengj "ba ba", hix mbouj dwg rumz bongj mbawfaex

yiengj "sa sa", dwg gij sing unqswnh caenciet doiq dou. Lauxsae, mwngz moix ngoenz baegaij cozyez dou, youq gwnz cozyez dou louz roengz gij ngauehoengz, cahoengz roxnaeuz gienhoengz, baihndaw hamz miz gij simgei cinglig mwngz, haenx couh dwg gij gyaiez mwngz doiq dou.

Lauxsae, mwngz vih dou hwnzngoenz sinhoj, moixngoenz mbwn ngamq rongh, mwngz couh hwnqdaej caeuj dou itheij baet hagdangz. Aenvih hagdangz raeuz gig gvangq, mwngz lau dou baet mbouj liux mbouj miz seizgan doeg saw, moix ngoenz cungj caenndang daeuj caeuj dou guhdoh baet, daengx aen hagdangz mbouj miz boux lauxsae lawz lumj mwngz yienghneix. Cingq

dwg mwngz guh yienghndei hawj dou, dou hix bienq ndaej engq gaenx lo.

Lauxsae, gou ciengzseiz yawj-raen mwngz daj ndaw ranz mwngz dawz gij cozyez dou roxnaeuz gobwnj byaij haeuj bangunhsiz, gou naemj: Mwngz itdingh dwg yungh gij seizgan yietnaiq mwngz daeuj gyaban ba. Lauxsae, mwngz vih dou sinhoj lai lo, gvaq mbouj ndaej mwngz lij caengz daengz 40 bi byoem couh hau haujlai lo. Lauxsae, mwngz aeu haeujsim ndangdaej mwngz bw.

Nyienh mwngz ndangcangq, angqyangz!

Hagseng mwngz: Veiz Danhmeiz 2016 nienz 10 nyied 10 hauh

(指导老师: 韦凤玲)